

LIBRU SESTU

Approdu a Cuma

Chiangennu ancora lu pirdutu amicu,
di cui capivu a pienu lu valuri,
s'attacca di pirsuna a lu timuni
Enea divinu e quannu vidi terra
s'avvicina, sicuru ca di Cuma
ddocu la rocca adergi di lu mari,
ca di luntanu scorgi lu palazzu
a Febu dedicatu ed unni staci
l'orribili Sibilla 'ncantatura.
Giaci lu portu circundatu a fauci
di pini sempri viridi, com'Apollu
vosi, in mimoria di l'amata ninfa
ca l'aspettu di st'arvulu pigghiavu.
Suvrasta lu palazzu, dunni l'ara
d'Apollu vi truneggia e vinni erettu
da Dedalu agghicatu comu aceddu
dalla luntana Creta cu lu figghiu.
La guerra di Minossi contr'Ateni,
l'effigi d'omu-toru nto recintu,
d'Arianna lu ruccheddu, di Teseu
la 'mprisa e l'ali a cira 'mpiddicati,
eranu vantu di lu basamentu
di stu palazzu di Sibilla sedi.
Dintra s'apreva l'antru in centu porti,
dunni nisceva di lu Diu la vuci
pi vucca sempri aperta di Sibilla.

Lu responsu di Sibilla

Purtannusi d'appressu u fidu Acati,
 trasivu Enea nta ddu casteddu vacu
 e quannu vitti l'orrida sibilla
 a trimari si misi comu fogghia.
 - Pirchè mi guardi e facci janca tieni?
 Nun fari llocu u guagliuncielle 'ncoppa;
 u tiempu é chistu di prigari a Febu
 ed addumanna chillu ca tu voi. -
 - Tu ca mavara si' nto munnu nota
 pirchè d'Apollu dici li misteri
 ca l'omini nun sannu dimmi, pregu,
 'n-soccu voli Pruserpina e Plutoni
 pi cunsintiri ca nto 'nfernù scinnu,
 comu me patri voli ca ju fazzu.
 Fammi sapiri si lu Laziu toccu
 e si fineru ddocu li me guai. -
 Chistu dicennu Enea risponsu 'ntisi
 cu vuci cavnusa, trasfurmata,
 ca fimminili certu nun pareva,
 eppuru la parrava la Sibilla:
 - Chillu ca cierchi é facili sapiri.
 'N coppa a lu ciummi Teviri ci 'arrivi
 prestu, cu lu guaglioni toi e di Creusa,
 ma guerra granni in chillu postu avrai
 pe te spusa' na femmina regina
 e guvirnari appriessu senza scuornu.
 Na rosa, n'ata rosa, ancora n'ata,
 in la furesta nate attuornu o 'nfiernu
 ha da purta' a Proserpina durate,
 ch'illa trattieni nto curtigliu a Cerberu,

c'agguaiata sultanto, se cuntorce e pena,
 ma nun é bonu a rompere 'o cullare
 ed a Caronte a varchitiella impegna,
 ca tu si vivu e l'obolo nun tieni.
 A tierza rosa in piettu si la tiene
 pi s'adurnari a maggiu la pirsuna.
 Chistu hai da fa' si vo turnari a cca,
 ma prima piense a seppelliri u muortu. -
 Lu figghiu di la Dea a Palinuru
 currivu cu la menti e si proposi
 di ripiscarlu a mari senza menu,
 mentri nisceva di ddu santu postu.

Misenu

Ma si sbagliavu Enea pirchè nto lidu
 na fudda vitti d'omini c'attornu
 a lu giacenti corpu di Misenu,
 guardavanu stupiti l'opra fatta
 di lu tritoni spidu mentri l'omu
 tirava la gumena di la navi.
 Misenu annuncia e noni Palinuru
 lu mortu fui ca sipultura aspetta,
 Misenu, ca fu d'Ettori cumpagnu
 ed ora ad iddu ci faccia l'araldu.
 Li nomi di Misenu e Palinuru
 ci dunavu a ddi posti di la costa
 dunni mureru st'omini fidati
 e sunu ancora daccussì numati.

L'Avernu

Turnavu nta Sibilla lu piu Enea,
 dopu lu funerali e l'ecatombi

offerta a l'infirnali riggituri
 e li tri rosi d'oru ritruvati.
 Idda lu porta nta nu postu orrendu,
 unni la terra trema e 'nsurfarata
 l'aria putisci scatasciannu fora
 di lu tirrenu spurtusatu a tratti.
 - Cca veni abbasciu. - dissi e nu purtusu
 orrendu e granni chinu di fumusa
 negghia mustra all'eroi ca ci trasivu.
 Scinnennu nta la terra ddu purtusu,
 ca 'n-antru lungarinu ci pareva,
 aveva nta li mura stampigghiati
 li mostri di li mali naturali.
 C'eranu tutti: la miseria, a morti,
 u sonnu, la discordia, lu duluri,
 a fami, li malanni, l'affannusa
 spiranza ca 'un agghica e nta lu funnu
 si videva di fogghi spogghiu 'n-olmu
 d'orrendu aspettu c'appinnuti aveva
 i vani sogni di l'umanitati.
 D'appressu si videvanu ragghianti
 l'omu triformi, la chimera, l'idra,
 l'omu cavaddu, li gorgoni, scilli,
 e l' autri mostri di lu mitu anticu.
 Enea si scanta e tira fora a spada
 ca difenniri voli a so pirsuna
 di ddi mostri ca parunu tucclarlu,
 ma la Sibilla lu cunvinci tostu
 ca l'armi sunu vani contru chisti,
 ca sunu sulu d'ummira faciuti
 ma facilmenti vinciunu nto munnu.

Caronti

Caronti infini appari supra a varca
ca s'accosta a la riva di lu ciumi;
cu l'occhi russi di dimoniu anticu
squadra la fudda nta la riva ferma
ca premi pi putiri traghittari.

E' genti ca murivu ed ora cerca
di trasiri accussì nto munnu eternu.

Si l'obulu non mustra lu chidenti,
Caronti lu rispingi e passa avanti.


Tra chiddi senza nenti nta li manu,
c'é puru Palinuru, c'addumanna
ad Enea di turnari a Velia, dunni
lu so corpu nun havi sepultura.

Sulu accussì putari poti l'obulu
pi trasiri nto regnu di li morti.

La sibilla assicura ca ben prestu
Caronti lu traghetta pirchè c'é
già nta lu lidu cu' ci sta pinsannu.

Quannu Caronti vidi ca l'eroi
nun era sulu spirdu, stracanciavu,
ma la sibilla ammustra a prima rosa
ed iddu allura cangia l'espressioni
pirchè capivu ca la voluntati
c'era suprema nta dda circostanza.

Passò lu ciumi 'nsemi a la Sibilla
supra la varca di Caronti Enea
ca sprufunnavu a moddu chiù di prima
pi differenti pisu naturali,
ma cunsintivu l'arrivata a ripa.
Dopu Caronti a Cerberu tuccavu



*Passò lu ciumi 'nsemi a la Sibilla
supra la varca di Caronti ...*

di mettiri la cuda in menzu l'anchi
pi la mustrata di la rosa d'oru.
Lu campu appressu ca ci cumparivu
era abiatu d'infantili genti,
ca morti foru prima di nasciri.
Dopu stu pratu d'angiuli chiamatu,
Minossi c'era ca la cuda gira
e l'animi spidisci nta l'Avernu
a secunna di l'opiri chiummuti.
Lu campu segui di fangusa mota
di chiddi ca la vita si livaru
ca nasciri vulissiru di novu.
D'accantu sorgi la ciuruta sedi
di chiddi ca mureru pi l'amuri.
Vitti tra d'iddi Paridi buttanu,
Didoni ca s'abbrazza cu Sicheu,
ca pirdunatu aveva la muggheri;
la facci nun ci apporta di parrari
ne mancu la rigina lu straguarda.
Prusegui lu camminu e tostu agghica
unni li morti valurusi stannu
ca persuru la vita cumbattennu.
Enea rividi li cumpagni morti
sutta li mura di l'antica Troja
ca ci si fannu attornu cu gran festa
e chiddi di li greci ca li scansa.
L'ummira ricanusci di Deifobu,
sfriggiatu nta la facci e senza nasu.
Ad iddu ni dumanna la cagioni
e cu duluri e chiantu la canusci:
comu fu Paridi ammazzatu, d'Elena

maritu addivintavu e mentri dormi
 la gran buttana greca lu tradivu,
 ca l'attaccavu nta lu lettu e ddocu
 acchiappari lu fici a Menelau,
 ddu gran curnutu ca l'assassinavu
 non prima di sfregiarlu daccussì.
 D'appressu Flegetonti apparì, ciumi
 di focu ca lu Tartaru ricingi.
 Dici Sibilla ca dda dintra stannu
 li chiù fitusi di l'umanitati,
 assemi a li giganti ca lu celu
 a Giovi cuntistaru ma pirderu.
 Dopu, lu campu Elisiu veni dunni
 l'eroi e li giusti illuminati sunu
 di janca luci e musica divina
 tra l'arvuli si senti e supra l'erba
 ciuri d'acculurati chiomi vannu
 criscennu in armunia di terra e celu.

Anchisi

Orfeu si scorgi, Assaracu ed Ilu,
 Dardanu padri e di Museu la facci,
 ca l'accumpagna dunni Anchisi staci
 tra l'animi vutati a riturnari
 supra la terra pi superchia fama.
 Tri voti s'abbrazzavu a lu Pinatu,
 ma pi tri voti leggi riturnaru
 li vrazza nta lu pettu di l'eroi,
 ca d'Anchisi ci stava nta ddu postu
 l'ummira sula senza corpu vivu.
 A dirici paroli di cunfortu
 si limitavu allura e quannu vitti



*Dopu, lu campu Elisiu veni dunni
l'eroi e li giusti illuminati sunu ...*

ca c'eranu d'attornu tanti genti,
 c'a picuruni l'acqua di lu ciumi
 vivevanu cuntenti dda vicinu,
 ci dumannò a lu patri spiegazioni.
 Anchisi dissi ca lu ciumi vistu
 era lu Leti ca putenza aveva
 d'astutari ricordu di passata
 vita, si l'acqua bivi cu' a turnari
 é destinatu novamenti in terra.
 - Propriu di chisti, aggiunsi Anchisi patri,
 ca destinati sunu a riturnari
 supra la terra vogghiu ca tu senti
 chiddu ca fannu e chi farannu 'n-jornu.
 Lu vidi a chiddu ca s'appoggia all'asta?
 Silviu sarà, ch'é sangu do to sangu;
 appressu vidi a Proca, Numitori,
 Capi e lu Silviu Enea, nta lu latinu
 situ pussenti e saggi fundaturi
 di li citati di Pomezia, Gabi,
 Bela, Nomento, Cora e poi Fidene.
 Appressu vidi a Romulu ca Roma
 faci supra li setti colli e figghiu
 di Marti é, ca la fera lupa addeva
 assemi a Remu, divintannu regi.
 Cesari ancora di la genti Giulia,
 ch'é di to figghiu Ascaniu discendenti,
 t'ammustru ca farà di Roma eterna
 lu faru chiù splendenti di lu munnu.....-

Omini celebri di la futura Roma

Cuntinua Anchisi cu forbitu accentu
 ad elencari l'omini e li fatti

di la muderna e di l'antica Roma,
non trascurannu a nuddu di ddi spirdi
ca 'ntantu l'acqua bivunu di Leti.
Parra di Deciu, di Camillu, i Gracchi,
i Drusi, di Catuni puru e Scipiu
e di l'illustri pirsunaggi tutti
di lu rumanu imperu e comu nasci.
Paroli spenni e versi strogghi arcani
ca cantanu la gloria e la putenza
di la famigghia Giulia ca cumanna
e cunta a Roma e ca discinni d'Ilu.

Parra financu di virtuti muti
ca nesciri non ponnu pi la morti
c'avvinni primatura di 'n-picciottu,
Marcellu dittu, niputeddu strittu
d'Augustu, imperatori nto mumentu
ca Virgiliu scriveva st'epopea!
'Mbriacu di nomi, fatti e fatticeddi
Enea ristavu, dopu c'Anchisi posi
fini a lu so parrari, ma lu scopu
di lu Penatu certamenti fui
chiddu di farici capiri a funnu
a ddu so figghiu ca scappava sempri,
di la futura Roma la putenza
e non particolari accadimenti
di lu futuru statu naziunali.
P'agghicari precisu e stu finali,
Anchisi appena cessa di parrari,
dopu li soliti saluti e chianti,
fa nesciri a so figghiu da l'Avernu
pi lu purtuni di li Sogni fausi,

ca daccussì ricordu vagu resta
 di l'ascutati fatti e lu sinturi
 sulu e vivu nta l'anima ci lassa
 di chiddu ch'é 'mpurtanti veramenti.
 Di l'autra porta di l'Avernu nesci
 cu sta pi riturnari nta lu terra,
 ca daccussì si scorda interamenti
 chiddu ca 'ntisi e visti nta ddu munnu.

Fora di l'Avernu

Iddu cuntritu nesci di l'Avernu
 tanticchedda 'ntrunatu ma cuscenti
 e la cunferma certa nta la sacca
 ca tuttu ddu scappari infini servi
 a fari d'iddu e di la so famigghia
 lu basamentu di futuru vantu
 tra populi vinturi e scanusciuti.

A la Sibilla paga lu disturbu
 d'oru e d'argentu dannu tanti cosi,
 ca daccussì acchiappannu la mavara
 sempri chiù ricca e china ti diventa.

Parrannu di mavari....

Di sti sibilli Roma n'ebbi tanti
 e nta li nostri tempi na caterva
 ci n'é ca cartumanti e maghi sunu
 ed hannu la pritisa di sapiri
 cosi futuri da li morti ditti,
 e bellamenti truffanu la genti,
 pirchè minchiuni e scimuniti, comu
 st'eroi trujanu ca scappannu jeva
 e truvare vuleva cosi streusi,

nta lu munnu n'avemu in quantitati.
 Ma riturnannu all'avventura scritta,
 dicemu ca nto tempu jutu a Roma
 'mpurtanza granni data vinni a maghi,
 stregghi vaticinanti e 'nsittaturi
 di fatti e di misfatti pirchè chistu
 era sancitu di la tradizionii
 e nenti si faceva e si diceva
 senza ascutari prima lu responsu
 d'Apollu divu, ch'era titolari
 di li futuri fatti da sapiri
 mediante l'interpostu....sibillami!

Gaeta

Supra li navi acchiana l'omu piu,
 ca si sinteva sempri di chiù piu
 e navigannu versu settentrioni
 l'ancura a sira nta lu mari cala
 nta na silenti rada di l'Italia.
 Ddocu si ferma pirchè staci mali
 chidda ca veramenti madri fici
 ad iddu picciriddu ed a so figghiu
 e ddocu infatti mori la vicchiarda
 ed a ricordu d'idda Gaeta chiama
 ddu portu dallu chetu mari azzurru,
 ca fu casteddu di difisa estrema
 di Roma, di lu Laziu e di l'Italia.